

Ulang Tahun Hari Keputeraan
Rasmi Yang di-Pertuan Agong

PM, barisan menteri Kabinet ucap tahniah

Kuala Lumpur: Perdana Menteri, Datuk Seri Anwar Ibrahim merafak sembah dan menzahirkan ucapan tahniah sempena Ulang Tahun Hari Keputeraan Rasmi Yang di-Pertuan Agong Sultan Ibrahim semalam.

Menerusi catatan di laman Facebook, Perdana Menteri berkata beliau bagi pihak Kerajaan Perpaduan mendoakan Seri Paduka baginda dan Raja Permaisuri Agong serta seluruh Kerabat Diraja agar sentiasa berada dalam keadaan sihat, sejahtera dan penuh keaulatan.

“Semoga baginda kekal qarar memayungi negara dengan adil dan saksama serta terus berada pada kedudukan paling tinggi dalam Perlembagaan negara, seiring fungsi institusi diraja sebagai pelindung agama Islam dan menjadi lambang perpaduan dan kesejahteraan semua kaum di negara ini.

Patik dan sekalian rakyat akan terus memberikan ketaa-tan dan kesetiaan yang tidak berbelah bahagi kepada institusi raja berperlembagaan. Dirgahayu Tuanku!,” katanya.

Timbalan Perdana Menteri, Datuk Seri Dr Ahmad Zahid Hamidi dan keluarga mendoakan agar pemerintahan Yang di-Pertuan Agong Sultan Ibrahim bersemayam di takhta kebesaran dengan penuh keaulatan, dilanjutkan usia dan sentiasa diberkati Allah SWT.

Timbalan Perdana Menteri, Datuk Seri Fadillah Yusof mendoakan semoga Seri Paduka baginda kekal qarar bersemayam di atas singgahsana

takhta pemerintahan dengan penuh kebesaran, keaulatan dan kesejahteraan serta memerintah dengan adil dan saksama.

“Patik dan seluruh rakyat Malaysia mendoakan agar Kebawah Duli Yang Maha Mulia Seri Paduka baginda sentiasa dilimpahi keberkatan. Dirgahayu Tuanku,” katanya.

Menteri Komunikasi Fahmi Fadzil turut merafak sembah dan mengucapkan setinggi-tinggi tahniah sempena Ulang Tahun Hari Keputeraan Rasmi Yang di-Pertuan Agong Sultan Ibrahim.

“Sembah takzim daripada patik serta seluruh warga Kementerian Komunikasi dan Pejabat Ahli Parlimen Lembah Pantai. Daulat Tuanku. Dirgahayu Tuanku,” katanya.

Menteri di Jabatan Perdana Menteri (Undang-Undang dan Reformasi Institusi) Datuk Seri Azalina Othman Said mendoakan semoga Allah SWT melanjutkan usia Seri Paduka baginda dan sentiasa dalam peliharaan dan rahmat-Nya.

Menteri Pendidikan, Fadhlina Sidek turut mendoakan semoga Allah SWT melanjutkan usia dan merahmati pemerintahan Yang di-Pertuan Agong Sultan Ibrahim.

Menteri Pertanian dan Keterjaminan Makanan Datuk Seri Mohamad Sabu mendoakan semoga Allah SWT mengurniakan kesihatan dan kesejahteraan yang berpanjangan kepada Seri Paduka baginda dan Raja Permaisuri Agong serta seluruh Kerabat Diraja.

BERNAMA